



# तुबारि

www.pangi.in

पंगवाड़ी, अंग्रेजी, त हिन्दी भाषा अन्तर

Issue - 103

April, 2021

इस मेहने तुबारि संस्करण तुसी हरालण जे अस तीं खुश असे। छने पढुण जे एन्हि कथाई त कविताई पुठ चिकिण दिए। वापिस इस पन्ने पुठ एण जे पन्ने पड्डे दुतो **विषय सूची** पुठ चिकिण दिए। तुं सुझाव त लेख के अस भाड़ते रेहन्ते। धन्यवाद

## विषय सूची

1.	<u>कपटी पेटु</u>	2
2.	<u>दुष्ट आधिबाडे</u>	3
3.	<u>विनोदे व्यापार</u>	4
4.	<u>अपु भाषा</u>	5
5.	<u>बुढे त कोर्डे</u>	8
6.	<u>भगवान बचान्ता</u>	10

तुबारि पढे

मस्त रिहे!



## कपटी पेटु



यक बुटे पुठ एक पेटु गुल्हा थिआ।  
तेसे बुटे तढे यक सगेली गुल्हा थिया।  
यक रोज जिखेई सगल अपु गुल्हे कियां  
बाहरी नीसी त पुठे केयां पेटु हेरी बुशो  
थिया। जिखेई से अपु गी कियां दुर ई पुजी त तेन पेटु तेसे यक  
गभुर अपु गभुरु जे खड़िया निऊ।

जिखेई सगाली बापस आई ता तेन पेटु कियां  
पुछु “की तेई में गभुर निऊ ना?” तेन बोलु, ‘आं’  
त सगेली तेसे छनेअरे की कि “में गभुर मेन्धे  
वापस दे।” तेस पेटु पता थिआ कि से सगाली तेसे  
गुल्हे तकर न एई बटती। तेन तेसे बोकी पुठ ध्यान  
ना दिता।



पर तेस बुटे केआं दूर ई यक देहर थिआ।  
तेन सगेली तेठिया जाओरा उमा आणा त तेस  
बुटे आग लाई छेई। ई हेर कइ तेस पेटु सुआ  
डर लग गा। तेन अपु गभुर बचाण जे सगेली  
गभुरु तेसे धे दी छे। शिच: अपु गभुर के सोबी झा लगती।

**विषय सूची**

# दुष्ट आधिबाडे



यक ग्रां यक जिमदार थिआ। तेन यक दाछि बगिंचा ला, त तसे चोहरो कना घोड़ी के बाड़ दी छई। दाछि रस किढण जे मोटे मोटे घोड़ लाई त पेहरा देण जे गुम्मट बड़ोउ त मेहणु के धे आधि दी कइ परदेश जे घेई गा। कुछ मेहने पता, जपल दाछि उन्होरणे टेम आ, त फल नेण जे तेन अपु नौखर आधिबाड़ी केई लंघाए। पर आधिबाड़े तसे नौखर टाई कइ यक मडे, होरा घोड़िए त होरा मिन मार छड़े।

तोउं तेन मालिके दुबारी होरे सुआ नौखर लंघाए, पर तेन्हे जोई बि तिहांणि किउ। अखिरकार, तेन ई सोच कइ अपु कुआ



तेन्हे केई लंघा कि से तसे इज्जत करियेल। पर आधिबाड़े कुआ हेर कइ अपफ बुच बोलुण लगे, ‘ए त हकदार भो, एईए अस मार छते, त असे सोब धन-दौलत नी छते।’ त तेन्हे से टाता त दाछि बगींचे बहार कीढ़ कइ मार छड़ा। त अब जपल दाछि बगे मालिक एईयाल त से तेन्हे आधिबाड़ी जोई की कता?” तेन्हे तेस जे बोलु, “से तेन्हे बुरे मेहणु बुरी तरह खत्म कता; त दाछि बगींचा तेन्हे आधिबाड़ी के धे देन्ता, जे टेम-टेम पुठ तसे धे फल देन्ते रेहेल।”



**विषय सूची**

# विनोदे व्यापार



एक दूध बेचण बाड़ा जेसे नउ विनोद थिउ। से कुछ साली अन्तर अमीर भोई गा किस कि से गलत तरीके जोई दुधे व्यापार कताथ। से अपु दुध बेचण जे दरेउ केयां पार नेन्ताथ। से अपु दुध अन्तर पुओणि मिआंताथ।

ईं कर कइ से सुआ रूपेई त सुने गेहेणे जमा कइ गो थिआ। त तेसे कुआ बि मोटी गो थिआ। त तेसे व्याह करणे टेम भोई गो थिआ। से सुआ गठा गहेण नव पुठ घिन गओ थिआ त अजगता तेन्के नाव पुओणि अन्तर उमली गई त सोभ रूपेई त गठा गहेण पुओणि अन्तर झाड़ी गा। से सोब तेई गा। त विनोद रोलुण लगा। तिखेईं पुओणि अन्तरा अवाज आई, “रोलुण बन्द कर। जे झड़ो असु से त तें थियु नाउ, से तेईं गलत हसाब जोई कमाओ थिउ। से त मेईं नी छऊ।”



## आरोग्य सेतु ऐप

कोविड-19 से आपको सचेत करने और आपको सुरक्षित रखने के लिये लान्च किया गया है!

अभी डाउनलोड करें



With Aarogya Setu, you can protect yourself, your family and friends, and help our country in the effort to fight COVID-19

If we are safe, India is safe.

## अपु भाषा

पांगेई सोबी मेहणु जे में अलग मेहणु यक शच असी, कि अपु भाषा कदी ना छाण। जेस मेहणु अपु भाषा बि ना एईयेल लागो त से अपु रीति रिवाज त संस्कृति बारे की जाणता। तोउं अउं हथ जोड़ी कइ सोबी पांगेई मेहणु जे विनती कती कि अपु गभुरु अपु पांगेई भाषा शिचाले। गी अपु गभुरु जुओई पंगवाड़ी अन्तर बोके करे पंगवाड़ी शचाले। किस कि तु गभुर हिन्दी त अंग्रजी स्कूल शिचते। पर पंगवाड़ी शचण जे तोउं तुस अपु गभुरु केस स्कूल लंघान्ते। आजकल हें पांगेई मेहणु होरी टाउ टोउ देण लगो असे। ई सोचते “एन अपु गभुर अंग्रजी स्कूल छड़े त अउं कि एस केआं घट असा ना। अउं बि अपु गभुर अंग्रेजी स्कूल छई सकता।” ई देखा देखी न करे।



आजकल त सरकारे सरकारी स्कूल बि हर सहूलियत दुतो असी त पहली क्लास केआं अंग्रेजी पढ़ाण बि शुरु कइ छो असी। अब एढ़या बध की लौतु? अगर गभुर पढुण भोल त सरकारी स्कूल बि पढ़तु। अगर ना पढ़तु भोल त तुस जत बि बोडे स्कूल लंघाल, तोउं बि गभुर न पढते। पेहलकण से बचारे सरकारी स्कूल पढ़े तेस टेम त स्कूली किछ बि न थियु। होर तेस टेम अंग्रेजी त छठी क्लास केआं शुरु भुन्तीथ। तोउं बि तेस टेमी मेहणु पढ़ी कइ बोडे बोडे अफसर बणे। अब त सरकार स्कूले जे हर किछ देण लगो असी। ए त तुं अपु मर्जी असी कि तुसी अपु गभुरु केस स्कूल पढ़ाण असे।

पर अउं सोबी पांगेई मेहणु के छनेअरे कती कि अपु गभुर पंगवाड़ी शिचाले त गी अपु गभुरु जुओई पंगवाड़ी अन्तर बोके करे, ताकि तुं गभुर बि अपु पंगवाड़ी भाषा शिच सकियल। यक लिंगि फि तुं छनेअरे अपु भाषा अपु भाषा भो। अपु भाषा बोलुण शर्म न करे। अगर ईहांणि सोब अपु अपु गभुर हिन्दी त अंग्रेजी शिचालते त यक टेम ई बि एई घेण असा कि गभुर अपु भाषाई पता ई नेई भुण कि हें भाषा कोउं भो।



अपु मोबाइल पुठ तुबारि पत्रिका पढुण जे अठवां पन्ने पुठ दुतो नंबर अन्तर संपर्क करे।

**कोरोना से बचें**

**सही से मास्क पहनें**

**हाथ धोएँ बार बार**

**निभाएँ दो मज की दूरी**

**जब तक दवाई नहीं तब तक ढिलाई नहीं**

## बुढ़े त कोईए



कुआ अपु बुढ़े आश्रम पुजाई कइ वापस अओ थिआ त तसे जुएली तेस जे फोन किया, “अपु बुढ़े जे बोल कि तुसी त्योहार अन्तर बिगी ना एण। अब तेठि बिश त शान्ति जोई असी जीण दिए। कुआ वापस मूड़ा त तेन हेरु कि तेसे बोउ तेस आश्रमे अफसर जोई सुआ खुश थिआ। से ई बोके करण लगे थिए जीं से यक होरी सुआ साल किया जाणतेथ।

तेन कोईए से अफसर पुछा “अफसर तुस में बोउ कपले कियां जाणते त केस बझई जोई जाणते। तेन हस्तु मुखे जवाब दता “जिखेई से अनाथ अश्रम कियां एक कुआ अपु धर्म पुत्र बणाई कइ घिन गो थिआ, तपल कियां अउं जाणता।”



[विषय सूची](#)

यात्रा से पूर्व  
सुनिश्चित करें  
बुखार या अन्य कोई  
लक्षण ना हो जैसे सांस  
लेने में तकलीफ या खांसी आदि



## तुबारि मासिक पत्रिका

- ◆ तुबारि मासिक पत्रिका ई उम्मीद करुं लगे असे कि एण बाड़े रोज अन्तर सुआ मेहणु इस कम अन्तर साथोट देन्ते।
- ◆ इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगी घाटि अन्तर पढुं जे त भाषाई सुहलियत करण जे इ पत्रिका शुरु किओ असी।
- ◆ तुबारि यक अवाणिज्यिक पत्रिका भो।
- ◆ तुबारि पत्रिका कोई मेहणु, जनजाति त संस्कृति गलती कढेण जे नेई छपाण लगे। अगर कोई ई सोचता बि त अस जिम्मेबार नेई।
- ◆ छपाणे पेहले सोब आर्टिकल दुई टाई पांगेई मेहणु हरालो असे। इ त खुली बोक असी कि पेहली बार पांगवाडी लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।
- ◆ आर्टिकल्स ना मिलएल, या घाटि मेहणु के साथोट ना मिलएल त तुबारि पत्रिका कदी बि बंद भुई सकती।
- ◆ कोई चीज छपां असी या नेई छपां जे तुबारि संपादकीय टीम पुरा अधिकार असा।
- ◆ अस किलाडु केन्द्रीय पुस्तकालय, त बजार हरिराम लाले दुकान अन्तर तुबारि ड्रॉप बॉक्स पुठ बि अपुं सझाव ओर अर्टिकल्स रखुं जे सुविधा किओ असी।
- ◆ अस सोबी पांगी मेहणु जे हात जोड़ कइ अनुरोध कते कि तुस बि कोई अछा अर्टिकल पुराणि या नोई कथा, कहावत, कविता, त नोई घीत (पागवाडी अन्तर लिख कइ छपां जे हेंघे दिए।

### तुबारि संपादकीय टीम



9418429574  
9418329200  
9418411199  
9418904168  
9459828290

# चटकले



• वेटर: “तुसी समोसे त पकोड़े अन्तरी बइ सम्हाई खाई छड़े त बाहरी बइ शपट कोस जे छड़ दुतो असे?”

ग्राहक: किस कि मोउं जे डाक्टर साहेब बाहरी चीजे खाण जे नाह किओ असा ।

विषय सूची



## भगवान बचान्ता



बोक पेहलकण जमाने भुओ। केसे ग्रां यक सधुबाबा थिया। से भगवाने सुआ बोडा भकत थिया। से हमेशा यक बुटे भेएड़ बिश कइ तपस्या कताथ। तसे भगवान बठ पूरा विश्वास थिया। त ग्रां बाड़े बि तसे तीं इज्जत कतेथ।

यक लिंगि ग्रां सुआ हड़ एई गोउ। त चोहरो कना पुओणि ईं पुओणि केएण लगु। सोब मेहणु अपु अपु जान बचाणे लिए इएर ओवर नशण लगे। जपल मेहणु हेरु कि सधुबाबा अभेईं बि बुटे पढे बिश कइ भगवाने नउ जपुण लगो असा, त तेन्हि तेस जे नशणे सलाह दिती। पर सधुबाबे बोलु, “तुस अपु जान बचाए, मोउं त में भगवान बचान्ता।” मठे मठे पुओणि बधुणतु गोउ त पुओणि सधुबाबे टशवाड़ तकर पुजी गोउ। तोउं तेन बइ यक नाव गई। नावी मल्लाहे तेस जे बोलु, “हे सधुबाबा, तुस इस नाव बठ चढ़े त अउं तुसी होरे जगाईं पुजाईं छता, जेठि तुस बच सकयाल।” “ना, ना, मोउं तें मदती जरुरत नेईं। मोउं त भगवान बचान्ता” सधुबाबे जवाब दुतु। नाव बाड़ा चुपचाप तेठिया घेईं गा।

थोड़ी देर पता हाड़ सुआ बध गऊ त सधुबाबे बुटे पुठ चढुण ठीक समझु। तोउं से बुटे बठ चढ़ कइ भगवान याद करण लगा। तिखेईं तेस सधुबाबे अजगता त दूरू आवाज शुणुण लगी, त यक हेलिकोप्टर तसे मदत करण जे एईं गा।



विषय सूची



तोउं बचाणे बाड़े तेन्हि मेहणु यक देउड़ त यक हेलिकोप्टर तसे मदत करण जे एई गा। तोउं बचाणे बाड़े तेन्हि मेहणु यक देउड़ तसे भेएड़ जे ढिन्याऊ त बोलु, “इस देउड़ कशि कइ टाण दिए।” पर

सधुबाबे फी बोलु, “अउं एस न टान्ता। मोउं में भगवान बचान्ता।” पर तसे हटे सम्हाणि कसेरी न चली त बचाणे बाड़े बि तठिया घेई गे।

तढिया पता बुटा हड़े बेलि बहोई गा त सधुबाबा मरी गा। स्वर्ग पुज कइ से भगवान जे बोलुण लगा, “हे भगवाना, मेई सच्चे मन जुओई पूरी उम्र ते तपस्या की, पूजापाठ की। पर जिखेई अउं डूब कइ मरण लगो थिआ, त तिखेई तुस मोउं बचाण जे ना आए। ई किस प्रभु?” भगवाने



बोले, “हे पुत्र! अउं तें मदत करण जे यक लिंगि ना, बल्कि टा टा लिंग आ। यक लिंग ग्रां बाड़ी के रूप अन्तर, दोका लिंग नाव बाड़े रूप अन्तर, त टेकी लिंगि हेलिकोप्टर बाड़े रूप अन्तर। पर तेई में ए बचाणे वक्त पिछाण न बटा।”

दोस्त, इस जिन्दगी अन्तर भगवान असी केही मौके देन्ता। इन्हि मौकी के प्रकृति छिक ई भुन्ति कि से केसे भाड़ी ना बिश्ते। से यक दौड़ो घोड़े ई भुन्ते, जे हें समाणि केआं झठ नशी घेन्ते। अगर अस तेन्हि पिछाण कइ तेन्के लाभ उठाई सकते, त से असी हें मंजिल तक र पुजाई छते। ना त असी पता पछताण एन्तु।

**विषय सूची**